

O LE SULU SAMOA



EKALESIA FAAPOTO POTOAGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IANUARI 2022

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

MAOTA FOU FAAFEAGAIGA EFKS TAFITOALA



**FAAFEAGAIGA EFKS APIA,
SUSUGA DR. LATU FS & LOTU LATAI**



FAASINO UPU

1. O LE LAUGA	2
2. SAUNOAGA TAITAIFONO FONO TELE	4
3. A'OA'O & FAIFEAU AVANOA	5
4. AMATA GALUEGA 2022	6
5. OSIGA FEAGAIGA EFKS APIA	6
6. MU LE MALUMALU EFKS PATAMEA	7
7. ASO SA TUPULAGA EFKS 2022	7
8. O LE PEROFETA MULIMULI	8
9. NA O AFIOGA E TULEI MAI FOFOGA	11
10. MAOTA FOU EFKS TAFITOALA	14
11. O E UA FAI I LAGI FOLAUGA	15
12. ATA O MATAUPU TUSIA	16

O LE LAUGA

Tusi Faitau: F. Tuai: Esara 1:1-11
F. Fou: Galuega 15:1-12, 22-29.

Matua - Galuega 15 : 11, “*A e peita'i ua tatou taofi, o le alofa tunoa o le Alii o Iesu Keriso e faaolaina ai i tatou, faapei o i latou lava*”.

Manatu Autu : **“OLE FEAUTAU MOMOLI O LE GALUEGA FOLAFOLA O LE TALA LELEI”.**

O le sini autū o se feau tau momoli, o le fia faalauiolaina lea o se mataupu, po o ni lagona fia faamautūina. O le faaleoina o ni suiga po o ni fe'ese'eseaiga ua mae'a ona soalaupuleina. E faapena foi se lagona i le fe'au tau momoli na aumaia e Ioane Vilamu i o tatou laufanua i le 1830, o se mataupu o lo o ogatotonu ai le Atua. O le folafolaina lea o le Tala Lelei ia Iesu Keriso i le vasa Pasefika, le vaega o le lalolagi e le'i o'o mai i ai muamua lea tala.

O le tala i le Atua e sili atu lona malosi, lona alofa ma lona silisili ese, nai lo atua sa tapuai ai tagata Samoa i na ona po. O le tala i le Atua e lē faatuā' oia lona alofa, ma o lana Faaolataga e mo tagata uma.

O le sini autū fo'i lea o le feau tau momoli o le galuega tala'i o le Tala Lelei, o loo atagia i le vaega o le Tusi o Galuega i le mataupu e pei ona ta'ua. O le feau mo le Faaolataga ua lē patino lea na o tagata Iutaia, a e ua faapea ona faasalafa e aofia ai ma tagata

o nu'u ese. Peitai e lē o se feau tau momoli sa faigofie lona taliaina, auā sa lūgā ma lālō i ai finagalo o tagata, i lona tatau ma le lē tatau ona fa'ataunuina.

Lea ua mae'a ona fa'atū le ulua'i Eklesia, e ala i le afio ifo o le Agaga Paia i Ierusalema, na liua ai loto o le toatele i le Atua. Lea foi ua amata ona faagasolo le galuega tala'i o le Tala Lelei, i Samaria ma isi nuu o loo nonofo ai tagata Iutaia, e pei ona i ai i le mataupu muamua (1) e o'o i le mataupu e iva (9). Ua amata mālie foi le galuega tala'i i nuu ese, e ala i le molimau a Peteru ma Konelio, ma talaiga a Paulo ma Panapa, e pei ona au'ili'i iliina mai i le mataupu e 10 e o'o i le mataupu e 14.

A e peitai ua i ai le faafitauli i le eklesia i Anetioka, i le va o tagata o nuu ese o loo toatele i lea eklesia, ma Kerisiano Iutaia o loo i ai.

O le fa'aseā a Kerisiano Iutaia, pe faapefea ona maua gofie e tagata o nuu ese le faaolataga, a e lē o ni Iutaia, e lē o latou fo'i o ni tagata filifilia e le Atua? Pe lē tatau ea ona peritomeina i latou, ma tausia tulafono a Mose, ona faato'ā talafeagai lea o i latou ma le faaolataga a le Atua? O se fesili e le'i maua gofie i ai se tali, auā e fa'i o le finau mai o Kerisiano Iutaia i la latou fo'i mau, a o Paulo ma Panapa i le finauina o le faatuatua ia Iesu Keriso, e lava lea e faaolaina ai le tagata.

E lē mafai ona tali atu se Kerisiano i le alofa tunoa o le Atua, e ala i le peritome.

O le lē maua o se i'uga i lea finauga, ua tonu ai i manatu ia ave loa lenei mataupu i le fono a le Eklesia aoao i Ierusalema, latou te faia mai se faaigua. O le fono i Ierusalema pei ona ta'ua i le mataupu atoa lenei e 15, ua fulisia uma lagona o tagata i le molimau a Peteru o loo i le fuaiupu e 6, e o'o atu i le fuaiupu e 11.

I lea molimau, o le ta'utinoga manino lea a le aposetolo i lana galuega, o le Atua e silasila i le loto o le tagata, a e lē o le vaavaai i le itu i fafo. Ua talia e le Atua Konelio ma isi tagata o nuu ese, i luga o le loto ua salamō ma le faatuatua. O le fa'aaliga o le taliaina e le Atua o tagata, o le aumaia lea o lona Agaga Paia, lea ua fa'amamāina o latou loto. O le talitonuga lea o Peteru ua mautū ai lona manatu, o se mea sesē ma le lē tonu, le peritomeina o tagata o nuu ese i le Eklesia i Anetioka, ina ia maua ai le Faaolataga pei o Kerisiano Iutaia, a o le alofa tunoa o le Atua, na ala mai ai le Faaolataga mo tagata uma. E faapefea la ona mo'omia le usita'ia pea o le tulafono o le peritome ma tulafono uma a Mose?

E tumau pea le tulafono o se faailoga o le feagaiga osia, i le va o tagata Iutaia ma le Atua, a e lē mafai e le tulafono ona faaolaina i latou.

O le ‘auga ma le ‘a’ano o le molimau a Peteru, e pei ona fai ma matua o le lauga e faapea: “*A e peitai, ua tatou taofi o le alofa tunoa o le Alii o Iesu Keriso, e faaolaina ai i tatou faapei o i latou lava*”. O le feau tau momoli lea o le galuega tala’i o le Tala Lelei mo le Ekalesia i Anetioka. O le faaiuga foi lena o le Fono Aoao a le Ekalesia i Ierusalem, ma o le faaiuga ua tonu ma talafeagai, auā sa lotolotoi ai le Agaga Paia o le Atua, e pei ona ta’ua i le fuaiupu e 28.

O le manatu tauave lea a Luka i le Tusi o Galuega. A lotolotoi le Agaga Paia i felafolafoa’iga ma sa’iliga manatu a le tagata kerisiano, e manuia ma lelei le i’uga.

Toe faafogofoga foi i la tatou matua, “*O le alofa tunoa o le Alii o Iesu Keriso, e faaolaina ai i tatou faapei o i latou lava.*”

O se feau tau momoli o le faamoemoe ola, o se feau taumomoli mo e o fia maua se mapusaga mai faigata o le olaga. O faigata e pei o le manatu ua tu’ulafoa’iina. O faigata e pei o le ola pologa i lalo o puleaga a isi tagata, ma ua moomia ai se fe’au faalototele, ina ia tumau pea le faatuatua i le alofa lē mavae o le Atua i le tagata.

E faapea le faamalie loto o le feau taumomoli a le Tupu o Kuresa, pei ona faamauinai i le Tusi a Esera 1 : 1-11. Lea ua lima sefulu (50) tausaga talu ona alu le tafeaga i lalo o le puleaga a Nepukanesa. O se taimi umi o saisaitia ma ola pologa le nu’u. Ua manatu foi tagata Isaraelu, o le a fa’aaauauina lea olaga pologa, ina ua tula’i le Malo o Metai ma Peresia, i lalo o le taitaiga a le Tupu o Kuresa le Sili i le TLM 538.

A o se mea ofoofogia, o le poloa’iina lea e Kuresa o tagata Isaraelu e toe fo’i e fausia le malumalu o Ierusalem. A o le mea mālie, o Kuresa e lē o se tupu e tapua’i i le Atua soifua, a e lē o manino foi po o le ā tonu lava le faapogai o lea poloa’iga.

A e i ai le manatu o le au su’esu’ e o le Tusi Paia, o le anavatau lea o pulega a Kuresa i ia ona po, o le toe faafo’i lea o tagata i o latou nu’u, e galuea’ina o latou laufanua, ma lafo lafoga i le Malo mo galuega fai. A e mo tagata Isaraelu lava latou, e mafua le poloa’iga a Kuresa ona sa faaosofia e le Agaga Paia o le Atua. Ma o le tali fo’i lea o a latou talosaga, auā ua lē lavā e i latou ona nofo pologa i nu’u ese, pei

ona atagia i upu a le fai Salamo 137:4-5, “*Pe faapefea ona matou pepese le pese i le Alii i le nuu ese? Ierusalema e, afai e galo oe ia te a’u, ia galo lava i lo’u lima taumatau*”

O lagona ia o le leai o se faamoemoe, o lagona o le tuulafoaina, o lagona o le nuu ua taumamao o latou manatu ma le Atua. Peitai o lea ua tatala le avanoa e toe fo’i ai i Ierusalem, ma ola ai i se olaga sa’oloto. O le feau faala’ei’au lea ua saunoa i ai le tupu o Kuresa.

A e ua lē gata ai i le faatagana e ō, a e ua tāpā fo’i e Kuresa se fesoasoani tau tupe mai tagata uma, ua manatu e nonofo pea i Papelonia. Ua poloa’iina fo’i e Kuresa le toe faafo’i uma o oloa o le malumalu i Ierusalem, na aumaia e Nepukanesa. Se feau lava ina a faatupu malosi ma faaosofia ai pea le fia vivii i le Atua. A o le faailoga manino o le toe faafo’i o faigataaulaga i le Atua soifua, ma le faasilisiliina o lona viiga e faavavau.

Ioe le Ekalesia ma le mamalu o le au fafia e faitau i le Sulu Samoa, o se faamanatu lea o le Tala Lelei mo i tatou uma a o tatou i ai i le amataga o la tatou savaliga o lenei Tausaga fou 2022. A o le fesili - O le ā se feau tāua ma le lelei o loo e nofo sauni e momoli atu mo lenei Tausaga fou mo lou aiga, o lau fanau, o lou nuu ma lou atunu, a e a le Ekalesia?

Fai mai le feau taumomoli o le Tala Lelei o loo molimau i ai Luka i le Tusi o Galuega, “*O le alofa tunoa o le Alii o Iesu Keriso e faaolaina ai i tatou.*” A e a le feau taumomoli a le tupu o Kuresa mo tagata Isaraelu, ia toe o e atia’e le nuu ma toe fausia le malumalu i Ierusalem.

O ia feau tau momoli mai o loo ogatotonu ai le Agaga Paia o le Atua. O le malosi lilo lena tatou te faatino ai a tatou feau ma a tatou galuega uma. O le Agaga Paia tatou te malolosi ma lototetele ai pea e faatino o tatou valaauiina eseese. A lotolotoi le Agaga Paia i mea uma tatou te fai ona sologa manuia lea o la tatou malaga o lenei tausaga.

Ua tatou i ai foi i lenei vaitau o le tele o mea ua tutupu mai i lo tatou lalolagi. O suiga ogaoga o le tau, a e maise ai faama’i, a ua faamanatu mai le feau o le Tala Lelei mo i tatou uma, E na o le alofa tunoa o le Alii o Iesu Keriso e faaolaina ai i tatou. O le alofa e lē faatuā’oia, ua avanoa ai tagata uma mo lana Faaolataga.

A o le ā se feau o loo momoli mai ai mo i tatou le au faitau ma le Ekalesia i ia mea ua tutupu?

Ioe, ia tatou tutumau pea ma le faatuatua i lo tatou ola tatalo e pei o la Iesu i Lona au soo, “*Ia outou mataala ma tatalo ina nei oo mai le faaosoosoga ia te outou..*” O le au’upega sili lea a soo se Kerisiano e pei ona a’oa’o ai Iesu i Lona au soo ma i tatou foi. Ua faamanatu mai foi lenei fe’au mo i tatou uma ina ia lē gata na o le upu folafola, a e silisili ia tatou galuega fa’atino.

O le ala foi lea na faama’ite ai e le Agaga o le Atua manatu ma lagona o le tupu o Kuresa e toe faafoi Isaraelu e ō e atia’e le nuu ma se’i toe fausia le malumalu i Jerusalema na olopalaina ma faaleagaina. O le faamoemoe ina ia faaolaina tagata e lē gata i la le tino a ia sili ona faaolaina i la le Agaga.

O le feau tau momoli lava lea na afio mai ai Iesu Keriso i le lalolagi. O le faatinoina o le alofa tunoa o le Atua mo tagata agasala. Na soifua mai i se olaga faapa’iaina, na maliu i lima o tagata agasala, na toe tu manumalo mai le oti ma le tuugamau, ina ia lē fano se tasi e faatuatua ia te ia, a ia maua le ola e faavavau.

Ia manuia la tatou savaliga o lenei Tausaga fou, ma ia i le Atua pea le viiga le faamanū ma le faaneetaga nei e faavavau faavavau lava. Amene.

*Saunia: Susuga Irenio Feata Tagaloa FS,
EFKS Eva, Matagaluega VAIMAUGA*

SAUNOAGA FAAMAFANAFANA A LE TA’ITA’IFONO FONO TELE, I LE TAPUNIA AI O LE ATUNUU (LOCKDOWN), 22 JANUARI 2022.

“*Ia outou vivii atu i le Alii, auā e lelei o Ia, auā e faavavau lava Lona alofa.*”

“*O mai ia, ia tatou ifo, ma ia tatou punonou; ia tatou tootuli i luma o le Alii o Lē na faia i tatou. Auā o lo tatou Atua lava Ia; o i tatou foi o le nuu ua fagaina e Ia, ma le lafu mamoe o i Lona aao.*”

“*Ia tumau pea i le Atua le viiga, le mamalu ma le pule aoao; ia oo i le faavavau, faavavau lava.*”

Ou te lē toe seutafilia le na’ā, pe ou te toe tau fagota i le sāo, auā ua lē tauilo ou paia faa le atunu, o paia faa-le malo, tainane ou paia faa-le Tala Lelei. Tulou, tulouna ia.

I le fesoasoani mai o le Agaga Paia o le Atua, ona o lo’u tulaga o le Taitaifono o le Fono Tele a le Ekalesia Faapotopotoga Kerisiano Samoa, i Samoa nei ma

atunu i fafo. E faaleoina atu ai i le loto maualalo, se feau faamalosi’au, a o se feau faamafanafana o le Tala Lelei; e lē faapito i le Ekalesia Faapotopotoga Kerisiano Samoa, a e mo si o tatou atunu pele Samoa, e afua mai ona ao, seja oo i sē aupito itiiti. E le fesigilia, ua tatou se’ei lili’ā nei i falagatete, ua lagona foi le loto popole, ua lē mautonu o tatou mafaufau. Ona o lima sauā o le faama’i oti, ua pā’ia ai le soifua o nai o tatou tagata.

O le manatu autū o le Tala Lelei o loo faamafaina e le Au Faitau Tusi Paia o le lalolagi i lenei aso (Aso Sa 23 Januari): O le fesili - “*O ai e matitiva?*”

Samoa e, o le matelāina, o le ‘uti’uti o le tamaoaiga, o ma’i ma faama’i, o taua ma sauaga e oo lava i le oti, o foliga na o le ola mativa. O le upu moni, ua tatou matitiva i le tino, mafaufau ma le agaga. O aga a le tagata mativa, o le ōle atu, aisi, au sulusulu i le fia ola. O ai ea a tatou sulu i ai? O ai a tatou ōle ma aisi atu i ai mo lo tatou ola?

O le upu moni, o lou soifua ma lo’u ola faatuatua, tatou te talitonu lelei ai ma mautinoa, na o Iesu Keriso lava, e ao ona tatou sulufa’i i ai. Ioe, o ai a tatou o i ai, o loo ia Keriso upu o le ola? O Ia o le Ala, Upu moni ma le Ola. Na o Keriso lava na afio mai, e folafola le Tala Lelei mo e matitiva, e aofia ai ma i tatou.

O le feau faamalosi ma faamafanafana a le Tala Lelei, Samoa e, tatou saili togafiti ia Iesu Keriso, e ala i le tatalo ma le anapogi. Ua fetalai Iesu, “*Na o le tatalo ma le anapogi, e mavae ese ai puapuaga ia te outou.*”

O la le fai Salamo, “*Ia fai ane pea o e fiafia i lau faaolataga: Ia viia le Atua. A o a’u ua ou puapuagatia ma mativa. Le Atua e, ia e vave mai ia te a’u. O oe o lo’u fesoasoani ma lo’u faaola. Le Alii e, ‘aua lava e te tuai mai.*”

Samoa e, o la ta tatalo fai faatasi lena. Tatalo ai oe, tatalo ai lou aiga, tatalo ai lou nuu, tatalo ai lou faiga malo, ma tatalo ai lou Ekalesia.

O le upu moni, o i tatou uma ua na o ni auauna. E lē mafaia e togafiti a foma’i, e lē mafaia e se fuafuaga poto a Komiti Faalavelave Matuiā, e lē mafaia e se tofa a lou Malo, e lē mafaia po o ai lava, ona faate’ā’eseina mai i tatou, mai a’afiaga ogaoga o lenei faama’i oti; na o le mana lava o a tatou tatalo, e faamanaina ai mea uma tatou te faia, i le fesoasoani mai o le Atua faamalolo. O le faamafanafanafaga: Ia tatou tutumau i le faatuatua, ma tepa taula’i ia Iesu Keriso, le Foma’i Silisili.

(faamae’ā’itulau 5)

FAIFEAU & A'OA'O AVANOA MO LE GALUEGA FAA-FAIFEAU TAUSI NUU

(E tusa ai ma le KFE 05/134, ua tuuina atu ai nei suafa o Faifeau & A'oa'o Nofo Aiga, mo le silafia e Aulotu auā latou faiga filifiliga. O i latou nei o loo galulue i galuega a le Ekalesia, i Samoa).

KOLISI FAAFAIFEAU MALUA:

Ua faamaonia mai e le susuga i le Faifeau Foma'i Pule o le Kolisi, e leai se tasi o susuga i Faia'oga o avanoa mo le galuega Tausi Nuu i le taimi nei.

FAIA'OGA I KOLISI A LE EKALESIA

1. Charlie Banse FS - A'oga Matātā Eseese
2. Setefano Logovii FS - Kolisi Tuasivi
3. Letaulau Mataafā AM - Kolisi Tuasivi
4. Fuatimu Posese FS - Kolisi Nuuausala
5. Faletoese Faletoese FS - K. Nuuausala
6. Mathew Simati AM - Kolisi Nuuausala
7. Peniata Laulau AM - Kolisi Nuuausala
8. Onosa'i So'o FS - Leulumoega Fou
9. Francisco Fatu FS - Leulumoega Fou
10. Faulalo Kennar AM - Leulumoega Fou
11. Falaniko Sio FS - Kolisi Maluafou
12. Iakopo Faasalaina FS - Kolisi Maluafou
13. Tia Gatoloai FS - Kolisi Maluafou
14. Meafou Ah Ching AM - Kolisi Maluafou
15. Sinapati Sone AM - Kolisi Maluafou
16. Falesefulu Falesefulu AM - Maluafou
17. Nuufaigata P. Mulipola AM - Papauta
18. Kuresa Tavalani AM - Kolisi Papauta

OFISA TUTOTONU A LE EKALESIA

19. Anzac Tuala FS - Failautusi Fesoasoani
20. Senetenari Autagavaia AM - Loia
21. Peniamina Neueli FS - Fai Eletise
22. Faamoana Fuimaono AM - Kamuta
23. Faitoaga Tolua FS - Sulu Samoa
24. Ututau Tauati FS-Ofisa Misionare
21. Faaui BJ Faaui FS-Ofisa Misionare
22. Onosa'i Mauigoa AM - Faitotogi Atiniae
23. Kapeni P. Matatia AM - Tekonolosi
24. Kilepoa Kilepoa AM-Fanua & Fale
25. Challis Pupi AM-Ofisa Fanua & Fale
26. Fiamalua Peleseuma FS-Inisinia
27. Aukuso Lee FS - Pule Fale Lomitusi

28. Leefu Pule AM - Pule EFKSTV
29. Elekana Lealiifano FS - EFKSTV
30. Martin Taumate AM - EFKSTV
31. Koroseta Tavita AM - EFKSTV
32. Paulo Sepuloni AM - EFKSTV

MATAGALUEGA A'OA'OGA KERISIANO:

1. Maleifua Tanielu FS - Faatonu
2. Peteru Seiuli FS - Faatonu Lagolago
3. Apelu Jr. Lelevaga FS-Ofisa Apia
4. Isamaeli Aula'i FS-Ofisa L.L.Aleipata
5. Ietitaia Solipo FS-Ofisa Vaimauga
6. Semikueva Su'a FS-Ofisa Taaloga
7. Farani Pauga FS-Ofisa Malua
8. Satala Sa'u FS-Ofisa Musika
9. Panapa Alafau FS-Ofisa Falealili S.S.
10. Vaegato'oto'o MageleFS-Faasaleleaga
11. Keresoma Seuala AM-Musika
12. Faalefu Tumutalie AM-Ofisa Faleata
13. Falealii Afamasaga AM - Ofisa Aana
14. Oli Levi AM-Ofisa Itu o Tane
15. Luulau Taulagi AM-Faasaleleaga
16. Tavita Jr.Pulu AM-Ofisa Apia Sasa'e

SAUNOAGA FAAMAFANAFANA TA'ITA'IFONO FONO TELE

E pei o la Paulo, "Ou te faatuatua i le Alii. Afai e tumau outou i le vaa, ona faaolaina lea o outou." Tatou loto tetele ia i le Alii ma le malosi o Lona mana. O lo tatou Atua, o le Atua fai wavega. E lūlūina lo tatou faatuatua. Peita'i e lē mafai lava e se malosi o lenei lalolagi, ona faate'a'ese'eseina mai i tatou, i le alofa tunoa o le Atua, o loo ia Keriso Iesu lo tatou Alii ma lo tatou Faaola.

Faamanuia atu i le paia o le Ekalesia. Faamanuia i si o tatou atunuu pele, i Samoa nei ma atunuu e mamao. Ia ia te outou uma, o 'a'ao lavea'i o lo tatou Alii, i nei taimi faigata o la tatou malaga. Soifua ma ia manuia.

AMATA GALUEGA O LE 2022

I FONOTAGA A LE KMTA

O le faasologa masani o galuega a le Ekalesia i tausaga taitasi, e taulamua ai Komiti a Tamā o le Ekalesia, ma le Laulau a le Fono Tele; ma sa faapea foi taualumaga o lenei tausaga 2022:

1. Aso Gafua 10/1: Faatalatalanoaga o A'oa'o Malua (Laulau Komiti Au Toeaina)
2. Aso Lua 11/1: Ta'utinoga A'oa'o Malua (Komiti Mataupu Tau le Aufagaluega - KMTA)
3. Aso Lulu 12/1: Fono Komiti Malua (Laulau Fono Tele, KMTA, Pule Kolisi Malua)
4. Aso Tofi 13/1: Fono KMTA
5. Aso Faraile 14/1: Fono Komiti Faamisionare.

O nei galuega/fonotaga uma sa auai mai ai Sui Usufono mai Matagaluega i fafo e ala i le ZOOM, ona e oo mai nei lava, o loo tapunia femalaga'iga faa-va-o-malo ona o puipuiga o Faama'i. E to'a 26 i latou sa manuia i le Su'ega Ulufale (Sulu Samoa Setema 2021), o i latou foi nei sa feagai ma le Ta'utinoga. Peita'i na o le 25 i latou na manuia le Ta'utinoga ma ua talia e ulufale, a e to'atasi le sui ua tolopo atu i le tausaga 2023 aulia i le alofa o le Atua, ona faato'a a'e lea o ia. O se avanoa lelei foi lenei e toe fofogaina ai mo le silafia e le mamalu o le Ekalesia, sui o le **KMTA** mai le nofo a Matagaluega o le Ekalesia Faapotopotoga Kerisiano Samoa:

1. Asotasi Gu Time FT (Taitaifono) - Apia Sasa'e
2. Leaso Tupa'i FT (Failautusi) - Faasaleleaga
3. Amuia Seuala FT - Itu o Tane
4. Ailepata Leuta FT - Aana
5. Fili S. Matalavea FT - Malua
6. Misipalauni Faatau FT - Faleata
7. Siolo Tauati FT - Apia
8. Aila Patea FT - Vaimauga
9. Tunumoso Iosia Soliola FT - Falealili Safata Siumu
10. Josefa Atapana Uilelea FT - Lotofaga Lepa Aleipata
11. Pouniu Faamausili FT - Aukilani
12. Silo'a Lologa FT - Manukau
13. Faatulituli Setu FT - Laumua o Aotearoa
14. Faleulu Malaulau FT - Niu Sila i Saute
15. Malifa T. Malifa FT - Niusauelese
16. Simeona Taefu FT - Niusauelese i Sisifo
17. Lance Tautiepa FT - Kuiniselani
18. Tauaaga Mataafa FT - Kuiniselani i Saute
19. Aviti Etuale FT - Vitoria
20. Makerusa Porotesano FT - Amerika
21. Tinetalii Gafa FT - Hawaii

OSIGA FEAGAIGA

EFKS APIA

O le Aso Toonai 8 Januari 2022 na osia ai le feagaiga a le EFKS Apia ma lo latou faifeau, susuga Dr. Latu Latai FS ma le faletua ia Lotu, i le Malumalu o le Taimane o le Vasa Laolao. O le Toeaina o le Pulega Apia Sisifo, susuga Efū Efū FT na ta'ita'i, tatalo le susuga Puletua Tapumanaia FS (Falelauniu), faitau Tusi Paia ma Lauga le Failautusi o le Pulega, Talalelei Tuafafu FS (Mulinuu). O le afioga i le Taitaifono a le Aulotu/Tu'ua o le afioaga o Alo o Sina ma le Fuaifale o Salavalasi, le Faletolu ma le Vainalepa ma Upu ia Tuisamau, le afioga Sui o le Fono Sui Tofia ia Hon. Tuiletufuga Le Mamea Ropati Mualia AF, na saunoa e molimau i le filifiliga a la latou Aulotu, o le filiga na fai e tusa o faavae a le Ekalesia ma le tofa a tamā o le nuu. Na faavae la latou filifiliga i le talitonuga ua lava ma mafatotoga le susuga i le Foma'i Faia'oga Kolisi Faafafeau Malua mo le galuega. Na folafola foi o le a tuuina atu e le Ekalesia le lagolago atoatoa i le faafeagaiga ma le faletua mo le manuia o le galuega, ia ola agaga o le nuu, a e viia ai le Ao o le Ekalesia. O le aganuu e o faatasi ma le Tala Lelei, ma na faafetaia le faifeau ma le faletua mo le talia lelei o la latou valaau.

Sa tali fuitau foi le susuga ia Latu fai mo la'ua sui, o le aso 3 Fepuari 2021 na taunu atu ai le valaau a le Ekalesia, o le ulua'i valaau lea mo i la'ua talu ona i'u mai Malua, ma sa le'i pine ona la'ua talia ma le fiafia ma le loto maulalo, ma faatali ai le aso e faamautū ma faatino ai. O le ata o le nuanua (sa i le Faasologa o le Sauniga) o le faailoga o le faamoemoe fou. O le feagaiga faato'a tatala i le finagalo fai to'atasi o le Atua, ma se faatofala'iga a le Ekalesia. O le aso foi lenei ua manatua ai matua ua maliliu, e na mua i malae i le galuega, pei o Fekusone Latai FS ma Olevia Faletoese ua maliliu. O Latu o le lupe faalele a aiga mai Saleimoa, Leufisa, Moataa, ma Ueligitone, a o Lotu o le taulaga soifua a Apolima ma Lepa.

Na valaaulia nisi o le sauniga mamalu e fai ma aao taumatau o le Aulotu, Pulega, Matagaluega ma le Ekalesia Aoao, e faafeiloa'i le faifeau ma le faletua. E aofia ai Toeaina o le Matagaluega Apia, le Failautusi Aoao, le Tamaitai Palemia, Pule o Malua, le Ta'ita'i o le Sauniga ma le au mau tofi, sui o le Aulotu ma Aiga na lua. Na folasia foi le 'Ie o le Feagaiga - 'Feagaiga Tumau Faavavau' na saunia e le Ekalesia, ma taualuga ai i le Sakarameta o le Talisuaga Paia a le Alii na ta'ita'i e Dr. Latu Latai FS

FAATAMA'IA LE MALUMALU EFKS PATAMEA E LE AFI

O le taeao o le Aso Faraile, 7 Ianuari 2022 na fai ai le sauniga lotu a le Ofisa Tutotonu o le Ekalesia, e amata ai galuega o lenei tausaga. Sa ta’ita’iina e le afioga Taitaifono Fono Tele, susuga Iosefa Atapana Uilelea FT. A o lea lava foi taeao, na tula’i mai ai se faalavelave mata’utia ma le faanoanoa i le Ekalesia, ina ua faatama’ia atoa le malumalu o le EFKS Patamea o le Itu o Tane i le afi. E tusa ma molimau a sui o le Aulotu, e mata o se faaletonu i le tulaga tau eletise na faapogai i lenei faalavelave, ua faaleagaina ai le malumalu atoa sa fai ai tapuaiga i le Atua. E faapea foi ona ta’ua, o le masina o Aokuso (Aso Sa Tama) ma Oketopa (Aso Sa Tamaiti) 2021, na lagonaina ai le nanamu o uaea peisea’i ua mū, e mata o ni lapata’iga faailoilo ia o lenei faaletonu.

O le EFKS Patamea o loo galulue ai le susuga Tanielu Tupusē FS ma le faletua ia Tuvalu. O le vайaso lava na sosoo ai, na savalia ai e le susuga faafeagaiga ma sui o le Ekalesia, le Ofisa Tutotonu o le Ekalesia i Tamaligi, mo fesoasoani i tulaga tau tupe, mo le toe fausia o se malumalu fou. Na talosagaina le Ofisa o Tupe ma taliaina ai i lea lava aso la latou Toomaga \$50,000. Sa faatagisia foi le Faamalumalu a le Ekalesia \$200,000, ma taliaina mo la latou nogatupe i le Faletupe Samoa Commercial Bank Ltd. O la latou sailiga tupe autū o le Leitiofoni sa lagolagoina malosi e le atunu, a e maise o le EFKS lava ia. O le Pulega Gaga’emauga, i le susuga i le Toeaina ia Palemia Reupena Tauiliili FT ma susuga Faafeagaiga, na latou tau’aoina le ta’i \$5,000 a le Aulotu i lea aso. E faaopoopo i ai le tamaoaiga o le alofa mai tagata ta’itoatasi, o aiga ma Aulotu eseese, o ta’ita’i o le malo ma le atunu, o aiga o le faifeau i atunu i fafo na latou foa’i le \$100,000, na maua ai le aofa’i o lea sailiga tupe e lata i le ‘afa miliona tala.

O le malumalu ua faatafunaa’iina, na amata fausia ia Novema 2015, i lona nofoaga fou a o galulue ai le Toeaina susuga Solinuu Paia’aua ma le faletua ia Galuafi. Na maliu le Toeaina ia Aperila 2016, tu’umuli le Faletua ia Me,a e ua tele ina mae’ a le malumalu, ma faapa’ia ai ia Tesema o lea lava tausaga. O le susuga Tanielu ma Tuvalu na amata galulue i le EFKS Patamea i le tausaga 2017, o le lona 21 ai lea o faifeau o lenei Aulotu talu ona faavae mai. Ia manuia le alo atu mo le toe fausia o se isi Peteli fou o le Alii.

FAAMAMALU LE ASO SA O TUPULAGA EFKS

O le Aso Sa mulimuli o le masina nei, 30 Ianuari ua atofaina i le Kalena a le Ekalesia e faapitoa mo ana Tupulaga Talavou. O le Aso Sa ua faatāuaina ai alo ma fanau a le Ekalesia, ma amata aloa’ia ai galuega faa Aoga Aso Sa ma Autalavou o le tausaga. O le Aso lenei na ulua’i faamamalu i le Aso Sa lona lua o Fepuari i tausaga taitasi, peita’i e le’i leva ona toe suia e tusa o le faatofalaiga a Tama o le Ekalesia, e pei ona sa auala mai i le Komiti Aoaoga Kerisiano. O polokalame o lenei Aso, e aofia ai Sauniga Lotu e faapaia ai Tofi o Faia’oga A’oga Aso Sa ma Taitai o Autalavou (o nisi foi Aulotu e faapa’ia ai ma Laulau/ Tofi o Aufaipese, Mafutaga Tina, e oo lava i Komiti galulue ua filifilia mo le tausaga). E potopoto faatasi Pulega/Matagaluega e mafuta, faatino Tala Tusi Paia, Pese ma Siva Faaleagaga, a o nisi foi o Taalogia ma Aganuu i aso o le vайaso. O se tasi o aiaiga taua o nei polokalame uma, o le faia ai o le Ta’utinoga Tupulaga Talavou EFKS (tusia i lalo). Na faalavelaveina fuafuaga o lenei tausaga, e Poloaiga a le Malo, mo puipuiga o le Faama’i Koviti-19. Ui i lea, o le sauniga lotu faapitoa mo le Aso Sa Tupulaga, sa faataunu ma faasalalau i luga o le EFKSTV, na saunia e le Matagaluega Niusauelese i Sisifo, ta’ita’i e le Toeaina Pulega Sini Sasa’e, susuga Kolia Fiu Kolia FT (EFKS Campbelltown), sa auai ma mautofai Tupulaga o lea Matagaluega.

TA’UTINOGA TUPULAGA TALAVOU EFKS:

O a’u o le tupulaga talavou o le Ekalesia Faapotopotoga Kerisiano Samoa. Ou te folafola ma ta’utino atu, Ou te ola ia Keriso i lo’u olaga atoa. Ou te auai i soo se sauniga lotu. E faitau ma su’esu’ e i le Tusi Paia. Ou te tatalo to’atasi pe tatalo faatasi i le manuia poo le puapuagatia. O le a ou faia amio pulea lelei i taimi uma lava, i soo se nofoaga, i le faatinoina o o’u tiute ma o’u nafa, i soo sa’u auauanaga. Ou te saili ina ia manuia lo’u nuu ma la’u Ekalesia, ia tauleleia ai lo’u aiga ma o’u matua, a e faasilisiliina ai le viiga, o le suafa mamalu o Iesu Keriso lo’u Alii ma lo’u Atua e faavavau. AMENE.

O LE PEROFETA MULIMULI

(*O le Tala Faa-Fagogo ua faa-Samoaina mai le tusi, The Last Oracle, tusia e James Rollins*)

“E leaga sa le’i mafai ona ia faavave teisi.” O le leo o Mapeletope e pei ua mana’o e faate’ a ese loa. “O le afafine o lo’u uso e i ai sana tama e lē atoatoa le mafaufau. Na ou ta’ua atu foi ia te oe? Peitai e lē o se tagata ma’i e faavalevalea. E tau lē mafai ona nonoa ona seevae.”

Na tutū i luga mone o le ulu o Iuri. “O le mea tonu lena e ta’ua, o le tagata e lē atoa a e tulaga ese le talenia.”

O le isi tamaloa na o le faamimigi o tau’au. Sa tupu atili le inoino o Iuri i le Amerika. E pei o Mapeletope, e toaitiiti lava tagata latou te malamalama tonu i le mataupu o tagata e lē atoatoa, e oo lava i le galuega faafoma’i. Na iloa lelei ma malamalama Iuri i le faalētonu o le lē atoatoa. E iloa gofie i le tulaga ese mai amio ma gaioiga e masani ai tagata soifua, i vaivaiga ma faigatā o le aga fesoota’i ma isi, faapea le tuai ona tali atu i lagona e tutupu a’e. Sa taunuui ai i puapuagā nisi o tamaiti e faigatā ona tautala ma tuai ona fesoota’i i gagana, o le faifai so’o o taga ma ta’u faafia le upu e tasi, o le silaloa i meatotino, ma e masani ona faalētonu a latou tu ma aga i le va feagai ma isi tagata ma mea e tutupu.

Peitai o nisi taimi, o le faalētonu lea ma lē atoatoa, e masani ona ia faatupu vavega.

E seā seā ona tupu, a e i ai taimi e faailoa ai e se tamaitiiti lē atoatoa, tulaga maoa’ e o le atamai i se mataupu po o se matātā faapitoa, e pei o le matematika, musika po o nisi tomai o faatufugaga. Mai le 10 pasene o tamaiti lē atoatoa mafaufau latou te fa’alia taleni maoa’ e faapitoa, o le mea sa aupito sili ona mata’ina e Iuri, o i latou toaitiiti e tulaga ese, e lauiloa i le lē atoatoa mata’utia, le toaitiiti sa tula’i mai e sili a’ e i isi, i a latou taleni sa ausia le faalupega o le atamai maoa’ e. I le lalolagi atoa, sa itiiti ifo o le fa sefulu i latou i le vasega lea. A e ui lava foi mai lea numera, sa i ai lava le to’alua pe to’atolu, na faasilisili le maoa’ e tulaga ese.

Sa tutupu a’ e i latou mai se laina kenera e tasi.

Na faalogoina le i’uleo o se upu Romani i lona ulu.

Kovihani.

Sa faa-taupupula sioa atu Iuri, e ati i le faamalama aga’i i le teineitiiti lauulu uliuli.

Na tomumu Mapeletope i ona autafa. “E lē tatau ona iloa e se isi sina iota o le mea o loo ta faia nei. Ina ne’i avea faamasinoga o Siamani Nuremepeka e foliga o se faamasinoga o ‘avetaavale soli tulafono.”

E le’i tali ane i ai Iuri. E le’i taitai ona malamalama Mapeletope i le aano atoa o lana su’esu’ega. A e ina ua mae’ a le solo o le Pa o Perelini, na mana’omia e Iuri ni puna’oa fou e fa’aaauai ai lana galuega. Na alu le sefulu tausaga atoa o faata’ita’i lēmū vai i Amerika. Na foliga mai e leai se faamoemoe; ona toe sua faafuase’i lea o le tau faa-polokiki. O le taua faasaga i tagata faatupu faalavelave i le lalolagi aoao na faamalosia faiga paaga ma sootaga fou. O ē sa fai ma fili ua avea nei ma uo mamae. A e o le itu e sili ona tāua, o le tuaoi o mea tonu ua solia. O se lalolagi fou, ua i ai ma se agaga fou. O se faaupuga tuai ua avea nei ma tulafono: o taunuuga e faamaonia ai auala na uia.

Soo se auala.

Tau lava ina avea mo le lelei lautele.

Ua leva ona silafia e le faiga malo o Iuri lenei mea. Na o Amerika na tuai lo latou fesaga’i ma lenei mea moni mata’utia le sauā.

“O le a le mea a lena teine o fai?” Na fesili ai Mapeletope.

Na te’i ane Iuri mai ona mafaufauga. Na tu a’ e i luga. O Sasa sa tu i le faalagolago, ma se peni maka mea lanu uliuli i lona lima. O lona lima sa faalele i luga ma lalo i luga o le pepa afifi manu fasi. Na ia tatui ma tatusi solo i tulimanu. E leai se foliga o se mamanu sagatonu. Na uma le tasi tulimanu ona faasaga ane lea i le isi.

Na manavanava loloa Mapeletope i le gaogaosā. “Sa faapea a’u na e fai mai e talenia le teine i le tusi ata.”

“Ioe, e talenia tele.”

Na fa’aaauai Sasa i lana gaioiga. O le tafafā na ia tusia muamua i le lanu meamata na faasolo ina tumu i tosi lapotopoto ma ‘osi’osi lanu uliuli. Na ia faalava ese mai le isi ona lima mai lona tino, e faasasa’o noa, e peisea’i o tau faa paleni lona tino mai se malosi ese mai se isi lalolagi.

Mulimuli ane ona pa’u’ū ifo lea o ona lima e lua i ona itu.

Na ia liliu ese mai le faalagolago, solovī ifo i se nofoa e kolosi ona vae, ma faalue lemū ai. Na afu lona muāulu. Na ia aapa atu i se poloka mea-taalo laupapa ua tia’i ma feliulia’i solo i ona tamatama’ilima, e pei o loo ia taumafai e su’e le tali o se paso na o ia e iloa.

Na faasaga atu Iuri i lana ata sa tusi.

Na faatasi atu foi i ai Mapeletope ia te ia. “O le a le uiga o na mea? Ua na o sa’ euga lapisi.”

“Naieti.” Na faafuase’i ona tautala faa-Rusia Iuri, a e sa popole...matuā popole tele.

Na ia faanatinati atu i le faitoto’ a e ui atu i le isi potu.

Na mulimuli atu ai Mapeletope. A o ia ulu atu i le potu o le teineitiiti, na o le faalue lava o Sasa ma feliuliua’i le poloka i ona tamatama’ilima. Mai lona poto masani anamua, na iloa e Iuri o le a gase ifo o ia i lalo mo sina taimi itiiti.

Na ia a’oa’oina mai foi nai mea e tasi pe lua e uiga i le taleni a Sasa.

Na oo atu o ia i le faalagolago ona ia sasae ese mai lea i lalo o le pepa afifi.

“O le a lau mea lena ua fai?” Na fesili atu ai Mapeletope.

Na liliu e Iuri le ata na tusi, faaū i luga ma toe faapipi’ i le faalagolago. O Sasa e i ai nisi taimi e tusi faafeliua’i ai ana ata. E lē o se mea fou i tamaiti lē atoatoa talenia faapitoa. E masani ona latou iloa le lalolagi e ala i ituaiga auala eseese. O numera e i ai o latou leo. O upu e i ai o latou tofo.

Na tau faa-sisila atu Iuri ia Sasa.

O ona mata pupula manaia lanu moana sa faatau pupula i lana poloka mea taalo.

Na liliu i tua Iuri ma ia iloa le ofo o Mapeletope. Na faatalatalata atu le tamaloa i le ata. Na tusi atu lona lima, aunoa se upu ma lona ofo tele. Mulimuli ane ona to’ulu salalau mai lea o ana upu. “Le Atua e...e foliga mai o se elefane lena e i le ogatotonu.”

Na sioa atu foi Iuri. Na tātā lona fatu i tottonu o lona fā’ā’ī. Sa lē tatau ona iloa e le teine tusi le la ata se’i vaganā sa i ai se mea na ia faaosofia o ia. O ituaiga ata nei na ta’ita’iina i la’ua i le Foma’i o Poleki – o ata o le Molo. Ua tatau ona la’ua gaioi faavave, e tatau ona tali atu i tottonu o le lua itula. E i ai le tapulaa i le lautele o le malosi o Sasa.

Na faalagolago latalata atu Mapeletope. “O le potu o loo i ai. E pei lava ou te iloa le nofoaga lena. Na ou avea i ai la’u tamaitiiti i le lua vaiaso talu ai. O le fale lapotopoto o se ata o le fale mataaga mo natura faasolopito. Na faanunumi mata o Iuri. “Le ata o loo i le Molo a le atunu?”

Le nofoaga na lafi ai lana manu na tulimmo se taimi umi i le asō. Na luelue le ulu o Mapeletope.

Na faataupupula Iuri aga’i i le fā’ata ma iloa ai na o lona lava ata. Pe na iloa mai i la’ua e Sasa i tua atu? A e sili ona tāua, pe mata na ia iloa mai le popole tele o Mapeletope i le mea na gaoia e le Fomai o Poleki?

E tasi lava le ala e iloa ai le tali.

Na tusi atu Iuri i le ata ma tautala atu ia Mapeletope.

“Ou te manatu e tatau ona logo lau vaega e o atu i ‘ō. I le taimi nei lava.”

6.48 afiafi.

Na fa’auau atili atu Karai i tottonu o le fale mata’aga. I tala atu o le fale lapotopoto ogatotonu faatasi ma lana elefane, o le auala eletise faaleitiō a Poleki sa tau tonu lava i se auala faa-fasitepu mo tagata lautele. Na mulimuli ai Karai sopoia le isi fogafale ma toe faaifo atili atu i luma. Na taunu faai’u atu i se faitoto’ a sekulatī sa faailoga mai, NA O LE AU FAIGALUEGA O LE FALE MATAAGA. E SA LE ULUFALE. Na taumafai atu Karai i le faitoto’ a. Sa loka i se loka eletise. E mana’omia se pepa maneta faamaonia a se tagata faigaluega e tatala ma ui atu ai iiinei. Sa faanunumi Karai. Sa faapefea la ona sao ma ui atu Poleki iiinei? Na tago ane Karai i lana uealesi o i lona fa’ā’ī ma valaau atu i le ofisa faatonu tutotonu. Na tali vave mai Penita. “Lau afioga i le Ta’ita’i?” “Finagalo malie lau susuga ou te mana’omia se fesoasoani.” Na faamatala atu e Karai le mea ua gata ai le ta’iala. “Ou te mana’omia le faatagaga e sopo atu ai mai iiinei.”

“Faatali mai iina, Karai. O lea o le a ou tago e sui lau pepa ID pasi ina ia mafai ona e fealua’i solo i fale mataaga o Simifisone.” Na fai sina umi o le taimi e leai se pisa. Sa mafaufau atu Karai o loo galue le faatonu i lana komepiuta. I ona autafa, sa faalagolago atu ai Kouasaki i le puipui ma mapumapu i le va o ona nifo. “Tago loa e faata’ita’i,” sa fai atu loa Penita. Na tago ane Karai faasosolo lana pepa i le faitoto’ a. Na ia faalogo atu ua tatala. “Lea ua i ai. O le a logo atu lava lau afioga i le i’uga o ma’ua sailiga.”

Na faai’u le talanoaga, ona punou atu lea o Karai ui atu i le faitoto’ a aga’i i avanoa i tala atu o le fale mataaga. E leai se eseesega tele o le itu lenei mai isi vaega e tele o le fale, pe ana fai sina aogā nai lo le teuteuina matagofie: o le fola ma’ua faailila i le tele o tausaga o solia i vae, o mōlī mumū vaivai, ma faitoto’ a laupapa o ona faamalama tioata e togitogiina i mamanu mananaia.

SU’ESU’EGA O INISETI, MEAOLA E LEAI NI IVITŪ, SAILIILIGA O MANU MA TAGATA, SU’ESU’EGA O LAAU.

Na tau atu le auala ui i tottonu o le ala paso – ona siisii lea i luga o le faiatuga a o la’ua latalata atu i se faitoto’ a e le’i failogaina. Na faalālā atu e Karai le

masini i le ‘au o le faitoto’ a. Na oso i luga fuainumera. A o la’ a o ia i tua, na iloa atu e Karai se isi ta’iala tau lē manino o alu atu i lalo o le potu talaloa. O le auala o le potu talaloa i luma na faagata i se laolao faapei o se ana, o loo laina ai i ona itu ni faitoto’ a ta’ata’ ai u’amea. O le itu e la’u ai uta o le fale mataaga. Na faatau pupula atu Karai i luga ma lalo o le potu talaloa, o faa-ata se vaaiga tauaitu o Poleki. Masalo le polofesa na ulu mai i totonu o le fale mataaga e ala i le vaega e fela’ua’ i ai uta, ona fa’aaauai lea i fafo ui atu i le faitoto’ a i luma o le fale mataaga.

Pe na ia faia lena mea e faate’ a faasesē ese ai se tasi sa mulimuli atu?

Na tago atu Koualasaki i le ‘au o le faitoto’ a ma faata’ita’ i ona tatala. “O lea e matala,” na fai mai ai ma tago atu lava tatala atoa i tua le faitoto’ a.

Na sau le manogi o le pefu, o vao mamago, ma sina namu arasi mai le avanoa pogisā i lumā.

Na tago atu Karai i totonu ma maua se ki o le mōlī, ona ia ki lea. Na faatumulia le pito i tua o le potu pei se ana i fata laupapa. O pusa fai i laau sa faapipi’ i ai faailoga mo fela’ua’iga i luga o le vasa, sa faaputu i se faaputuga i le tasi itu. E tele ni pusa sa talai. O nonoa tuai ma le tele o laupapa manutinuti pinati mo le teuina o oloa i totonu o pusa sa paepae solo i le fola.

O se potu teu oloa.

O le itu agavale o le faitoto’ a, sa i ai se laulau o i ai i luga se komepiuta ma le masini lomitusi. Sa laina ai i le isi itu ni laulau, o tumu i ‘ulo ma ni vaega o poloka ma’ a teuteuina. E i ai se tasi sa fai lana faitauga oloa. Sa i ai nisi oloa na taatitia i luga o pailate laupapa i le mao totonu atu o le potu: o se faatagata fausia i le mapu o se fafine ma ona lima ua to’ulu ese, o le ulu faatagata o le povit po’ a ‘apa memea, o se faavae o se pou fausia i ma’ a.

Na mulimuli atu Karai i le ta’iala i totonu, a o ia tau manatunatu pe se ā na ta’ita’iina le polofesa e soli atu le auala lenei. Pe sa lafi mai se leoleo na savali atu iinei? Peitai o le auala na ui ai le polofesa e foliga e tuusa’ o. Na taunu tonu lava i se tasi o mea faitino i luga o pailate i le fola o le fale, o se fausaga o se maota ‘afa lapotopoto e vane mai papa. O le fausaga sa taatia o lona maualuga e tau i le puimanava sa i ai ma se pu i ona luga. Sa foliga mai o se faatusa o se mauga mu maamora, vaganā ai sa usitia i ni tusitusiga. Na punou faatalatalata atu Karai i tusitusiga.

O Lomiga Faa-Eleni o Aso Anamua.

Na faanunumi foliga o Karai a o ia siaki i lana masini.

Sa iloga le faataamilomilo o le savali a Poleki i autafa o le pailate.

Na su’esu’ e e Karai tulagavae o le tamaloa ua oti. Aiseā na naunauta’ i maofa ai Poleki i lenei fausaga? A e na te le’ i manatunatu atili, sa faate’ ia i se patatū leo tele mai lona itu agavale. Na ia liliu ma vaaia Koalasaki o sōsō ese mai se tasi o laulau. Na ia taofia le ‘au o se fagu i ona tamatama’ ilima. Ua nuti uma le tele o le mea tu’ u teu i ona tamatama’ ivae. “Ua...ua ta’ e.”

O le tamaloa sa i ai le meaalofa mo mea tonu ma le manino.

Na lūlū le ulu o Karai. Sa tatau ona ia taofia Koualasaki i fafo. Sa pei o se povit po’ a i totonu o se faleoloa o oloa ta’eta’ ei ma’ ale’ ale – pau o lea, o le povit e sili atu ai lona pulea lelei.

“Sa māluelue.” O lona leo to’atama’ i e mafuli i le ita ia te ia lava. “Sau iinei e te vaai i le mea lea.” Na ia faasino atu le ‘au o le fagu aga’ i le laulau.

Na sitepu ese Karai i lona itu. I luga o le laulau sa faaputu ai le tele o tupe siliva Eleni anamua. Mai le avanoa o le laina lona lua, sa misi ai se tupe siliva e tasi. Pe mata o le tupe siliva lena a Poleki? Pe mata o iinei na ia avatua ai?

“Na ou lāvea ai i le fagu. Sa ou taumafai e sapo mai.” Sa tago atu Koualasaki ma le faaeteete tuu le ‘au o le fagu i luga o le laulau.

“Sa malepelepe lava o ia i o’u lima.”

“E leai se mea e te popole ai. O le a tōese le tau mai lou totogi.”

“Oi sole. E te manatu e fia se tau?”

“Pe na o nai selau.”

Na mapu ea le tamaloa. “O lena e feoloolo.”

“Na o nai selau afe.” Na faamanino atu ai e Karai.

“Oi lo’u Alii e...”

Na vave ona momotu le ūi a Koualasaki e le gogolo o le ‘au o le faitoto’ a. Na amata ona faliu Karai o le a faasaga atu i ai, peita’ i o le lima māfiafia o Koualasaki na ia aapa atu ma taofi mai lona ogalima ma toso mai i lalo. Na ia pupuni Karai i lona tino laulauā a o ia se’ i ane lana tama’ i fana .45 mai lona faamoega i lona tau’ au.

O le fuatino itiiti o se tamaitai talavou na ulufale mai. Sa autago solo i lana ‘ato, o loo nimo ia te ia le to’ a lua lea e i totonu o le potu. Na ia autago tauaso solo i le ki o le moli, se’ia oo ina ia silafia mea e lua i le taimi e tasi: o le moli o loo ola, ma le mauga tagata o loo faasino atu lana fana i lona fatafata.

NA O AFIOGA E TULEI MAI FOFOGA O LE ALII

I LENEI TAUSAGA, IA VIIA LE ATUA, MA FIAFIA IA TE IA

³¹*Ia outou faia mea uma lava ia viia ai le Atua.* ”
I Kori. 10.

Ile tausaga 1643, na soloia ai e Maota o le Palemene i Egelani le auala sa pulea ai le Lotu Egelani. O le faapotopotoga o faifeau e selau luasefulu ma le tasi ma tagata lotu e tolu sefulu na potopoto i Uesiminisita e soalaupule le toe fausia o le Eklesia i Egelani. O tusitusiga na ali a'e mai lena fonotaga sa faia i tausaga e ono, o nisi ia o faamaumauga aupito ta'uta'ua i le tala faasolopito o le Eklesia.

O le ulua'i fesili i le A'oa'oga Pu'upu'u Uesiminisita (Shorter Westminister Catechism) e faapea, “O le a le i'uga aoao o le tagata?” O le tali: “Ia viia le Atua, ma ia fiafia ia te Ia e faavavau.” O faauigaga o lena fesili ma lona tali e maoa'e lo latou faigofie. Ma pe afai e te atamai, o le a e avea e fai ma mamanau o lou soifua auauna i lenei tausaga fou ua aulia.

Ia viia le Atua. Ia usitai i le Atua. Ia fiafia i le Atua.

Pe afai e te silafia o loo viia le Atua i lou olaga, e te fiafia i Lona auai faatasi mai; peitai afai e lē o lea, o le a e taumafai e 'alofia o Ia. Ma e lē o se mea lelei lena, auā a aunoa lou olaga ma le Atua, o le a faapefeara ona faaeaina oe ma e maua le manuia moni? E lē lelei! Pe afai e te toe tepa i le tausaga ua te'a, e i ai ni mea e te faanoanoa ma salamō ai, ina ua e iloa e le'i viia ai le Atua? E lē afaina pe afai sa i ai ni lapse, o tatou lava o tautai e sē le atu i ama. Ua aumai e le Atua le isi tausaga fou lenei ina ia toe sasa'a ai le fafao, ma toe faalelei masae o le upega. Pe afai foi ua faataatia ni fuafuaga mo lenei Tausaga Fou, ia faavae mea ta'itasi i luga o Afioga Paia a le Atua:

³¹*Ia outou faia mea uma lava ia viia ai le Atua.* ”
I Kori. 10.

Pe afai e mulimuli i lenei faatonuga, o le a sagatonu le savali i le ala sa'o, ma o le a e maua le filemu ma le olioli ina ua iloa o lou soifua ma mea e te fai o loo fiafia mai ai le Alii. O ā mea e tutupu ma tula'i mai, o le a faafetaia'i i le filemu ma le to'amālie, ina ua iloa o loo faatasi mai le Atua ia te oe. Pe mata o le uiga foi lea o le faaigoa o le Tusi Fai Lotu a le EFKS, i le IA VIIA LOU SUAFA, ona o le autū lea o le tagata ma lana tapuaiga, ma ana mea uma e fai-ia viia ai le Atua na o Ia lava.

'AUA NE'I LELEA 'ESE MALE 'AU

¹⁷*O lē itagofie ua amio faavalea o ia.* ”
Faata. 14.

Pe afai e lē lava le onosa'i, ua lē taofia le ita o se tagata, ma na fai ai ni upu mamafa po o ni gaioiga matavale, o se tasi o faaupuga e masani ona faamatala ai lana amioga ua fai, i le gagana faa-Peretania e faapea, 'ua lelea 'ese ma le 'au' (flying off the handle). O le faaupuga e faasino i le ulu o le sāmala, ua mamulu 'ese mai lona 'au a o taumafai se tagata e fa'aaogā. Ma e tele lava ni faalavelave e tutupu mai ai, ma nisi a'afiaga ogaoga pe afai e tula'i mai lea tulaga - o le lelea 'ese o le ulu sāmala mai lona 'au, pei o nei:

(1)Ua lē toe aogā le sāmala. Atonu e lelei tele ma tāua lau feau o loo fia ta'u atu, peita'i o le auala o loo momoli atu ai, e fuafua i ai lou maua o i'uga e te mana'omia pe leai foi. I se gagana faigofie, pe afai e lē manatu mamafa tagata ia te oe ona o lau gagana ma lau amio, e lē taitai ona tau ni lau o sou faamoemoe.

(2)E faaleaga e le ulu o le samala ni mea se tele. Pe afai e lelea 'ese le ulu o le sāmala, ua aunoa ma se toe faatonutonu, e ono faatama'ia ai soo se mea e tau atu i ai. O upu ma tala e masua atu i le ita e faatupu le manu'a, e umi lava se taimi e lē mafai ona toe fofō. Fai mai le apostolo o Iakopo, “¹⁹*O lenei, o'u uso pele e, ia taitasi le tagata ma faataalise ona faalogologo, ia faatelegese ona tautala atu, ia faagesegese ona ita.* ²⁰*Auā e lē tupu le amiontu mai le Atua i le ita o tagata.* ” *Iakopo 1.*

(3)Mata e umi se taimi e alu i le toe faaleleia o le sāmala faapea ni mea ua na faaleaga. Onisi foi taimi, e lē mafai lava ona toe faaleleia e oo i le i'uga. Pe afai e masa'a le ipu vai, e leai se poto ma se vave na te mafai ona toe faamaoopo mai. E toe salamō ane ua tuai, ua lē aogā.

(4)O le fautuaga faa-soifua maloloina, E sili lava le puipuia, nai lo le toe tau togafititia. Ma o nisi nei o Afioga a le Atua e tatau ona manatua pea, ma mulimuli ai e lavea'iina ai le ita, a e maise le faasaoina o le tele o malepelepe ma masofasofa e tutupu mai ai:

Faataoto 14, “¹⁷O lē itagofie ua amio faavalea o ia.”

Salamo 37, “⁸Ina soia e te ita, ma ia tuu lou tiga; ‘aua e te faameo, nei e faia se mea leaga.”

Faataoto 19, “¹¹O le mafaufau o le tagata e faagesegese ai lona ita; o lona viiga foi lea, ina ua lē manatua lona agaleagaina.”

Failauga 7, “⁹Aua lefaataalise ona ita o lou loto; auā e tumau le ita i loto o e valelea.”

(5) Ia manatua o lou valaauna e le Atua e fai Lona finagalo, e ala i au fe’au ma ou tiute feagai, ua faatusaina ai oe i le sāmala “²⁰O oe o la’u sāmala, o le au’upega o le taua.” Iere.51. O i tatou o mea faigaluega ia atoatoa ma maopoopo i taimi uma, a e lē o le lele ‘ese o le ulu mai lona ‘au, ma pei o le lou ua aunoa se maga, e tusa ma lea foi faatusa.

O LE AUMAI MA LE AVATU

“*Ina alu ia, ma ia e faapea atu i lena nuu.*” Isa.6.

Pe afai o loo e aafia i le galuega a le Atua, e i ai taimi e faaososoina ai oe, ma e faigofie tele ona e maua i le faafitauli o le lē paleni, ma i’u ane ai ua e fiafia i le galuega a le Alii, e sili atu nai lo le Alii e ana le galuega; pe faapea foi, ua pele ia te oe le galuega, e sili atu nai lo lou alofa i le Alii e pule i le galuega. Na muamua valaaatu e Iesu ona soo ia te Ia; ona Ia auina atu lea o latou mai ia te Ia. O le malosi e te manaomia ina ia manuia lou valaauna mai le Atua, e maua mai le taimi e te mafuta ma faasoa ai ma le Alii, a e lē o tagata.

O le tasi aso na ave ai e Iesu ona soo e to’atolu i luga o le Mauga na Liliueseina ai o Ia. “²ua pupula mai ona fosoga e pei o le la...³ua fa’aaali mai Mose ma Elia ia i latou, ua latou fetatalatala’i ma Ia.” Sa faagaeetia ai Peteru i le mea na tupu. Fai mai a ia, “⁴Le Alii e, e lelei ona ua tatou iinei; a e finagalo i ai, ou te faia iinei ni fale apitaga se tolu;” Na mana’o Peteru e nofo ai iinei, peitai na fetalai mai le Atua mai le Lagi, “⁵O lo’u Atalii pele lena...ia outou faalogo ia te Ia.”

Mulimuli ane ona toe ave ifo lea e Iesu o ona soo i lalo o le mauga ma latou amata ai ona auauna atu i tagata sa manaomia le fesoasoani. E lelei ma aogā nisi taimi paganoa o ‘fe’umiaiga i luga o le mauga’ ma le Atua, peitai e lē mafai ona tatou nofonofo ai pea iinā. E i ai galuega e fia fai i lalo o le mauga. E tatau ona paleni le aumai i totonu ma le avatu i fafo.

E tasi le aso o le tausaga e ulufale ai le Ositaulaga Sili i totonu o le Ana e Sili ona Paia, ma la’ua fesaga’i ai ma le mamalu o le Atua. O se faamanuiaga tele ma le fa’aalolo mauluga lenei! Peita’i o le tausaga atoa e faatino ai lana galuega i fafo i le mea o i ai tagata. Ina ua uma ona fesaga’i Isaia ma le mamalu o le Atua na lūlūina ai faavae o faitoto’ a o le malumalu, na faapea ane o ia, “⁵Auē a’u nei! Auā ai a’u a fano.” Ona faapa’i atu lea o Ia i lona gutu ma faapea atu, “⁹Ina alu ia, ma ia e faapea atu i lena nuu.” Ma o le feau lena ua valaauna i ai i tatou e fai, i lenei tausaga ma aso uma o lo tatou ola.

TU’U SE AVANOIA IA IESU

Mataio 4, “¹⁹Ona fetalai atu lea o Ia ia te i laua, “Ina mulimuli mai ia ia te a’u, ou te faia oulua ma fai faiva i tagata.” (O nisi lomiga o loo faaliliuina, “ou te faasino atu ia te oulua pe faapefea ona fai.”)

E ui ina e lē iloa e isi tagata ou agavaa, a e silafia lelei e Iesu. Na Ia silasila i se au fai faiva, o tagata lē taualoa mai le lautele, ma na silafia o loo i ai i nei tagata le agavaa latou te suia atoa ai le lalolagi. O loo i ai iinei se mea moni atonu e te le’i manatunatu muamua i ai: e pei ona 2 itu o le tupe siliva, e faapea foi ona 2 itu i le avea ma soo e mulimuli ia Iesu – e te talitonu ia te Ia, ma e talitonu o Ia ia te oe.

Na fetalai Iesu ia Simona Peteru ma Anetere’ a, ‘Mulimuli mai ia te a’u, ou te faasino atu ia te oulua pe faapefea ona fai.’ E te masalosalo i ai i lena upu? Sa faapena foi Natanielu. Ina ua valaauna Natanielu e feiloa’i ma Iesu, na ia faapea ane, “⁴⁶E mafai ea ona tupu o se mea lelei mai Nasareta?” Na tali atu Filipo, “Ina sau ia, ina matamata” (Sau e te vaai ma e iloa ai lava e oe). ” E uma lava le 3 tausaga na vaai ai i vavega, o masalosalo pea le au soo ia Iesu. E lē tioa Lona saunoa soo ia i latou, ‘Outou o e faatuatua itiiti’; Tou te lē ‘āu talitonu lava’; ‘Pe ana outou faatuatua, ua outou vaai.’ Na silafia e Iesu le naunau o le au soo e fia iloa pe se a le mea a tupu pe a la tuua i latou a e afio a’ e i le Lagi. Na Ia fetalai atu ai, “¹⁶Ou te fai atu foi i le Tama, ona foai mai ai lea e Ia ia te outou le tasi Fesoasoani, ina ia tumau pea o Ia ia te outou e faavavau.” Ioa.14. I le gagana Eleni, o le upu ‘Fesoasoani’ o le ‘parakletos’, o lona uiga, ‘o se tasi e sau i ou autafa e fesoasoani/lagolago atu’. O le upu moni, e leai se aso e tasi o lou soifua e te lē

manaomia ai le fesoasoani o le Atua, po ua lē avanoa ai o Ia mo oe. Atonu o lena lava e te masalosalo. Afai o lea, ia e loto tele! O Iesu e alofa i tagata masalosalo. Silasila foi ia Toma, na filifilia e Iesu e ui ina o se tagata faa-talitonu gañā. Atonu foi e te faapea ane, e tele ou vaivaiga. E faapena foi Peteru – peita’i na filifilia lava e Iesu mo le tele o faamoemoega faapitoa. Tau ina e alu atu ia te Ia i le tulaga o loo e i ai nei, ma avea Lona i ai i ou autafa e te soo ai ia te Ia. Faata’ita’i nei, e leai se faigata. Afai sa e taumafai muamua i au lava auala ma au metotia ma lou poto a e lē manuia, o le valaa mo oe i le aso nei, sau, tu’u se avanoa ia Iesu!

FAAITITIA LE POPOLE FAATELE LE TALITONU

Mareko 4, “¹⁹A o le loto popole i mea a lenei lalolagi, ma le pepelo o le ‘oa, ma le tu’inanau i nisi mea, ua oo atu i totonu o le loto, ua fetina’iina ai le upu, ona lē fua mai lava lea.”

I le Faataoto o le LūlūSaito, ua a’oa’o mai ai Iesu i fatu saito na pa’ū i ituaiga eleele e 4: (i) o le auala, (ii) o le mea papa, (iii) o le vao tuitui, (iv) ma le eleele lelei. O fatu na pa’ū i le eleele lona (iii) ua faatusaina lea – “¹⁸O i latou foi sa lūlūina i le vao tuitui, o i latou ia e na faalogo i le upu, ¹⁹A o le loto popole i mea a lenei lalolagi, ma le pepelo o le ‘oa, ma le tu’inanau i nisi mea, ua oo atu i totonu o le loto, ua fetina’iina ai le upu, ona lē fua mai lava lea.”

Ia maitau mai mea latou te taofia le Upu a le Atua mai lona galuea’iina atoatoa i o tatou olaga:

- (i) O le popole vale ina ne’i lē tausia i tatou e le Atua.
- (ii) O le manatu faapea a tele tupe ma oloa, o se maota tele, o se taavale manaia, ma nisi vaaiga matagofie i le vaai a tagata, o le a sili atu le fiafia e maua ai.

O le fesili e mafaufaui i ai: E te manatua ina ua e manatu ifo o lou tofi ma lau galuega, o lou laoa/maota e te afio ai, ma teugatupe e faaputu ma teu, latou te ave’ese mea uma e te popole ai? Tailo, ailoga! Auā e lē faapena le faatulagaina o le soifuaga masani. O le tele o ‘mea’ e te maua, o le tele foi lena o mea e te fa’aalau, e leiloloa ma māumāu, o le tele foi lena o mea e te va’afia ia malu puipuia, o mea e faaleleia atili, ma alu i ai le tele o ou taimi ma lou mafaufaui. E

faateteleina ai lou popole i lou manatu ifo pe tua ma ni ā, tua i fea, fai mā ai nei mea uma, pe a mavae atu lou ola. O le popole i mea o le lalolagi e pala, e tusa lona malosi ma lana galuega e fai, ma le la’au tuitui e fai i le saito - na te tutui, tapē, titina ma ave’ese i fafo le ola mai le mafaufaui ma le loto o le tagata.

I le isi itu, e tuufaafeagai aafiaga o le popole, ma le filemu ma le olioli e maua mai i le talitonu i le Atua mo mea uma tatou te mana’omia. E silafia e Ia mea e tatau ma lelei mo i tatou ta’itoatasi, ona Ia foa’i mai lea; pe afai foi e silafia e Ia e lē talafeagai, ona Ia foa’i mai lea o nisi mea e sili atu, e sui ai.

O se mea ofoofogia e tupu pe afai tatou te mafaufaui loloto i folafolaga uma a le Atua. O tatou popolega uma o le a faaititia ma i’u ina leai, o tatou mafaufaui ma amio o le a toe faa-polokalameina, ma o le a faafouina le fiafia i le soifuaga i aso uma. Ua fetalai mai Iesu, “³³A ia outou mua ’i saili Lona malo ma Lana amiotonu; ona faaopoopoina atu lea o ia mea uma ia te outou.” Mata.6. E fautuaina ai le faamuamua o le Faitau le Tusi Paia ma Tatalo i Aso Uma i le lisi o mea e fai i le aso nei ma aso uma o lenei tausaga ma i ē luā.

AUALA E FU TELE MAI AI (1)

“¹⁶Ua filifilia outou e a’u; ua ou tuuina atu foi outou, ia outou ō, ma ia outou fua nai ni fua, ma ia tumau o outou fua.” Ioa.15.

Pe a tuu i se isi faaupuga, o loo fetalai ma a’oa’o mai Iesu, ‘Ia faa-alu o outou ola i le sailiga ma tuliloaina o mea tāua faaleagaga, mea e faavavau ma tumau o latou aogā! O le mea lena na ou filifilia ma tofia i ai outou.’ Pe se ā le uiga o ‘fua’ o loo fetalai ai Iesu? O lona uiga o ‘fua’ faaleagaga. “²²A o le fua o le Agaga o le alofa, o le olioli, o le filemu, o le onosai, o le mataalofa, o le agalelei, o le faamaoni, ²³o le agamalū, ma le amio mamā;” Kala.5. O nei fua e 9, latou te faamatala manino mai le ituaiga soifuaga e tasi ua tonu ma tusa, e fa’aaogā i ai le mānava ola ua Ia foa’i mai.

O le mea e sili ai, ua lē tu’ua toatasi i tatou e fua mai nei ituaiga fua i a tatou lava taumafaiga na o i tatou. E leai. Ua fetalai Iesu, “¹O a’u nei o le vine moni, a o lo’u Tamā o Lē galue vine ia. ²O la uma lava o ia te a’u e lē fua, e ave’eseina e Ia; a o la uma e fua, e teuteu e Ia, ina ia fua mai atili...⁴Faapei o le la e lē mafai ona fua pe a na o ia, pe afai e lē mau i le vine; e faapea foi outou, pe afai tou te

lē tumau ia te au. ⁵O a'u nei o le vine, o la outou. O lē tumau ia te au, ma a'u ia te ia, o ia lava e fua tele mai; auā e lē mafaia e outou ona fai o se mea e tasi pe a a'u lē i ai." Ioa.15.

O ai o loo fetalai i ai Iesu? O le au faatuatua e i ai i tatou, o Lana Ekalesia (*O la uma lava o ia te a'u*). O ai le galue fanua? *O lo'u Tamā o lē galue vine ia*. O le a Lona faamoemoe? Mo i tatou ina ia *fua mai atili*, ia fua mai pea lava pea, ia faateteleina ma si'si'i pe a i luga le faitau aofa'i ma le 'ānoa o tatou fua faaleagaga. A o le a le mea lilo e fua atili ai? O le mafuta mafanafana ma fesoota'i vavalalata i taimi uma ma Iesu. *O lē tumau ia te a'u ma a'u ia te ia, o ia lava e fua tele mai*. O le mea lea, pe afai e te lagona e lē o tulaga lelei le fua o lou soifua faaleagaga, e ao ona vave fai se fuafuaga e faaleleia, a e le'i ave'eseina e Ia. Pe afai foi e fia fua mai, fua atili ma faalausoso'o, ia tupu ma ola e pei ona Ia a'oa'o mai i le auala e fua tele mai ai.

AUALA E FUA TELE MAI AI (2)

"³O le pogai o e amiontonu, e lē faagae 'etia lea." Faata.12.

O se mea lelei tele le taumafai e faaloloto a'a faaleagaga, ina ia mafai ona mausalī le ola a'e, ma ia fua mai ai. *"Amuia le tagata o lē faatuatua i le Alii, o lē ua fai le Alii mona faatuatuaga.* *⁸Auā o ia e faapei o le laau ua totō i tafatafa ane o le vai, ua sosolo atu ona a'a i tafatafa ane o le vaitafe, na te lē iloa foi pe a oo mai le vevela, a e lauolaola ona lau; e lē atuatuvale i le tausaga o le lā mala, e fua mai pea lava ona fua."* Iere.17. O Afioga Paia nei a le Atua ua ta'u mai ai le mafua'aga e tasi e mana'omia ai le loloto o a'a faaleagaga: ina ia faasaoina ai i taimi leaga – taimi o le vevela, ma le lā mala. O la le Poto o Solomona, *"³E lē faatumauina le tagata i le amio leaga; a o le pogai (a'a) o e amiontonu, e lē faagae 'etia (lia'iina) lea."*

O le oo mai o aso leaga ma laveia ai i tatou, e iloa ai poo fea tonu o 'maua'a' ai le tagata: o le Atua ma le malosi o Lona mana, po o le poto ma le malosi o le tagata ia. Pe a tautala le Tusi Paia i le 'vevela', o lona uiga e faasino i faigatā o le olaga. Pe a tautala i 'lā mala', o lona uiga o tau o faalavelave ogaoga fesooota'i i le mativa ma le ausage. O le a le tali? *'O a'a e o'o le sosolo i le loloto o le vai'*. O le a lona taunuuga? *E lē uma lona fua tele mai.*'

(fa'auma itulau 15)

FAAPAIA MAOTA FAIFEAU EFKS TAFITOALA

O se tasi o galuega na faai'u i ai le tausaga ua mavae, o le faapaiaina lea o le Maota o le Faafeagaiga o le EFKS Tafitoala, Pulega Siumu & Safata o le Matagaluega Falealili Safata Siumu. O le Aso Lulu 29 Tesema 2021 na faia ai le sauniga e tusa o lea faamoemoe, na ta'ita'iina e le Toeaina o le Pulega, susuga Kereta Fuafiva FT. Sa faavae le Upu faafetai, faamalo ma faamanuia, a o se faamalosi'au atili a le susuga i le Toeaina, i le Tusi faitau o lea aso, *2 Korinito 9:6-15, Ta'iala e Fo'ia ai Tulaga Lamatia*. O le faletua o le Taitaifono Fono Tele, afioga Tekimatang Uilelea na ia 'o'oti le lipine e tatala aloa'ia ai le galuega o le maota e tolu ona potu moe, le ofisa, potu malolo ma isi vaega masani o maota. O le Aulotu i Tafitoala e 25 ona Matafale, ma e tusa ma le molimau a se sui o le Ekalesia, o lenei galuega na amata mai le masina o Ianuari 2021. Sa toe taofia ona o nisi foi galuega a le Aulotu na ave i ai lana faamuamua, ma toe fa'aauau ai i le masina o Iulai se'ia oo ina mae'a ma faapa'ia ai e tusa o le sauniga o lea aso. Na fai la latou Aitalafu i le kamupani o le SMI sa teu ai la latou \$40,000. O le tau atoa o le galuega e \$118,831.86. E oo mai i le taimi o lenei lomiga, ua valaaolina e le Ekalesia le susuga Tanuri Pesaeli FS, o le faia'oga Kolisi Maluafou e nofoaiga i Alafua, e fai mo latou faifeau, ma pe afai e tusa ma le finagalo o le Atua taunu le faamoemoe, o ia lea o le a muamua fa'aaoga lenei maota fou.

O le afioga Taitaifono Fono Tele, susuga Iosefa Atapana Uilelea FT, na saunoa e fai ma sui o le Ekalesia Aoao e faaleo le faafetai ma le faamalo i le mamalu o le EFKS Tafitoala, e tusa o lo latou faamalolosi ma onosa'i e ati a'e le galuega a le Atua i totonu o le afioaga. E ui ina sa feagai le Ekalesia ma le tele o nisi galuega, o le tulaga faigata sa feagai ai ma le tatalaina o le feagaiga ma lo latou faifeau talu ai, peita'i e le'i taofia ai le faataunuina o tiute tatau ma galuega lelei, mo le manuia ma le saogalemu o le au faigaluega totofi mai a le Atua. Na ia faafetaia foi le afioga Matuaofaiva ma le Falefa o le Aiga Salemalama, tainane foi le tapua'iga a le Toeaina ma le Pulega, faapea le Matagaluega atoa, auā e le sili le ta'i nai lo lea. Sa taualuga le saunoaga a le Taitaifono i lona tau'a'ao atu o le meaalofa a le Ekalesia Aoao e \$10,000, faatasi ma la la'ua lava tau'a'aoga, a e maise faamanuiaga mo le 2022.

O LĒ UA FAI I LAGI LE FOLAUGA

SINA ELIZABETH COLLINS PERESETENE

22/1/1940 - 19/1/2022 (81+11+29)

Na soifua mai i le Aso Gafua, 22 Ianuari 1940, a e maliu i le Aso Lulu, 19 Ianuari 2022. Ua 81 tausaga, 11 masina, 29 aso o lona soifua. O le aso o le toe sauniga, o le Aso Tofi 20 Ianuari 2022. O le Afioga Sina Elizabeth Collins Peresetene ia o se tasi o tina matua o le Ekalesia EFKS Vailele ma o ia foi sa avea ma faufautua lelei i totonu o le mafutaga tina a si a matou Ekalesia. O Sina o le faletua o Peseta Peresetene o le tiakono matua. O Sina o ona nuu o Magiagi, Fagamalo, Fasitoo-uta, Malie, Fusi Saoluafata. Sa ekalesia o ia i le tausaga 1953.

TOFIGA/KOMITI/MAFUTAGA SA GALUE AI ILE EKALESIA I VAIKALU

- Mafutaga Tina-Failautusi /Teutupe
- Aufaipese, Faiaoga Aso Sa, Failautusi a le Autalavou, Taitai Lutena (Lieutenant) a le Auatama. O le Afioga ia Sina PESETA o se tinā sa fiafia e tautua ma sa fai ma ana mea suamalie le ola faauauna. Sa faamanuiaina e le Atua i taleni e tele, e fesoasoani i ona faiva alofilima faatinā. Amuia lava Sina auā e valaau mai le Matai a e o loo faapea ona faia le finagalo o le ALII. Sa tele valevale alofa ua momoli mai ona o Sina sa faasafua lona alofa i soo se tagata a o soifua mai o ia. O Sina o se tina fai mea mafai, loto foa'i ma e loto alofa foi i le aufaigaluega a le Atua ma soo se tagata. Ua lologo faa-Tutuila le faafogaga a le aofia i le molimau a le toatele I GALUEGA LELEI na faia e lenei tina. E tautala galuega, o ana galuega mae'ae'a mo soo se tagata, lea lava na faailoa tino i lona toe sauniga.

E viia pe a Atua soifua i lana pule faa-soifua. Le Atua o le ola, Lē soifua e fa'avavau, ma Lē ua avea ma õ tatou fesoasoani i taimi uma o le puapuaga, e lē finagalo e fa'atigā pe fa'apuapuagatia le fanau a tagata. O le Atua e fa'amafanafana i ē ua fa'anoanoa ma foa'i mai lona alofa tunoa.

Sa ta'ita'i le tamā o le Pulega le susuga ia Enefatu Lesa FT (EFKS Tanoalei'a) i ona toe sauniga i le aso 20 o Ianuari 2022. Sa molimoli mai lona sa i

totonu mo lona toe sauniga e le susuga ia Semikueva Faatoafe FS (EFKS Moataa). O le Tusi Paia na fatauina e Ionatana Te'o FS (EFKS Mauga Fiafia), o talosaga o Petaia Leavai FS (EFKS Fagalii), a o le lauga o Seilala Luamanuvae FS (EFKS Vaivasetai). O le molimau a le Ekalesia sa saunia e lana faifeau, Siaosi Salesulu (FS). Sa faai i lona oliolisaga tumau i lona maota i Vailele. Ia tafi mala lau faigamalaga ma ia maua lou nofoaga tumau i le Malo o le Lagi. Ia manuia lau malaga Sina.

*Saunia: Siaosi Salesulu (FS)
EFKS Vailele. Matagaluega VAIMAUGA.*

AUALA E FUATU TELE MAI AI (2)

O la'au tetele ituaiga o 'laupapa-mūmū' i laufanua o Kaledonia i Mātū, ua lauiloa i lo latou gafatia ona tatali le ma'ema'e o afi ma mū o vaomatua. Pe afai foi e fuatia le 'u'umi o a'a o se aoa tele, e fai tau selau ma selau kilomita lona aofa'iga. O le mafuaaga lena o le lē afaina pe maluelue i taimi o afā.

O toafa o Arisona e ola fefiloi solo ai ituaiga o vao ma laau eseese, e matuiā le tuufafeagai. O le vao mago matuitui (tumbleweed) e lelea solo. Aisea? E leai ni ona a'a. Peita'i le laau apulupulua matuitui (saguaro cactus), e mafai ona fua mai i le malūlū e 50 tikerī. Aisea? Auā e oo atu le sosolo o ona a'a i le 20 mita i soo se itu.

E mana'omia le loloto o a'a faaleagaga ina ia gafatia ma tete'e atu i 'loulouā' o le olaga. Atonu e mafai mo se aso e tasi pe lua, a e faapefea pe afai e faa'umi'umi ma tosotosololoa le fefe, popole ma atuatuvale, o le lē mautonu pei ona i ai a'afiaga o le Koviti, Teleta ma le Omikorona? E maua le malosi mai punavai ma puna'oa o loo faavae ai le ola. O la le Fai Salamo, "O ia foi e faapei o le laau ua totō i tafatafa ane o vaitafe, e fua mai ona fua i ona lava tau.." O loo tusia e Paulo, "¹⁶Ia foa'iina ia te outou e tusa ma le faula'i o Lona mamalu, ia faamalosia outou i le mana e Lona lava Agaga i le tagata i totonu, ¹⁷Ia nofo mau foi o Keriso i o outou loto i le faatuatua; ina ia maua'a ma faavaeina outou i le alofa, ¹⁸ia mafai ai ona iloa lelei e outou ma le au paia uma...¹⁹le alofa o Keriso ua silisili ese e lē mailoa, ia faatutumuina outou i le tumu uma lava o le Atua." Efe.3.

**SINA ELIZABETH COLLINS
PERESETENE (UA MALIU)**



**NISI O MOLIMAU O LE ASO
I LE EFKS TAFITOALA**



VAAIGA MASANI I ALO MA FANAU, I LE ASO SA O TUPULAGA EFKS



MALUMALU EFKS PATAMEA, NA MU I LE AFI

